

復齋先生龍圖陳公文集

復齋先生龍圖陳公文集卷第十八

祭文

南康歸祭朱文公先生墓

某質性鄙頓自羈貫成童已蒙提誨獨恨不果登門
授業第於遺訓口誦心惟竭來試郡廬阜之陽距先
生遺跡甫四十年大綱大法粗得遵承而心術之微
言不得一二每竊震懼官滿東歸取道墓下痛念昔
我先公之歿先生不遠千里來弔先生之逝某之兄
弟宦遊南北曾不得旬旬往哭及是始獲躬奠一觴
俯仰疇昔有負幽明伏惟英靈不棄貲其罪而誘其

哀俾為學有得於暮年庶幾乎復拜於他日

祭勉齋黃先生祠

維先生傳道之嫡以淑諸人某鈍頑之質學既過時
又多病早衰每佩居設博文約禮之誨晝夜誦思惟
恐失墜諸生奉祠春秋俎豆儼若師保之在前講貫
遺書庶幾先訓之不墜病不能詣直謂自弃一厄寓
敬先生其鑒之

祭李果州道傳

公生于西州家學有原紫陽之道聞而知焉希之則
是如出親傳把麾持節抃活顛連立朝挺挺憂國奉

孝義不苟合懷綬歸田廬阜南北淹晉經年嘯詠泉
石信宿棲賢歸舟未發丹旄翻然邦人惜公如思召
伯遺像有嚴清標介特我來慨慕情何能克

祭李蘄州文

偉哉我宋斯文始昌士志於道如行康莊贊娑之
區東萊傑出學者宗師中道而歿公自羈紲挺出諸
生幼之所學見於壯行運蹇下僚晚綴朝著唯義之
從獨立不懼俎豆是習往當邊陲胡虜猝至孤城受
圍人曰勿守可全民命公曰死之大義始定公以家
殯為士卒先民亦致死孰使之然自反不縮百勝猶

敗公以義勝雖死何害人謂之歟我謂之勝彼秦者
虜寧不心敬巍然立廟天子褒忠諸將愧死百代
聞風我昔與公嘗蔡是托豎守星渚書問亦數聞公
之死狐疑半載弔不以時歔歔感慨一觴往奠冤兮
如在

祭時通判淵

唯公天賦剛毅英發蚤從名師聖賢是法自公筮仕
見義勇為視國侯家以公減私危言正色可判姦究
苟利於時雖死不悔以公之才何官不宜連蹇半刺
不得有為東萊之門高第者幾唯李與公同志同里

去年喪李今又喪公士夫異壯幾於一空我昔與公
同寅宗邵辱愛情親如兄如弟聞公之訃但若拊膺
天胡不仁喪此典刑一厄往莫有淚如傾

祭傳忠簡

惟公剛方正直而濟之以惠慈高明俊偉而加之以
謙敬故在朝則國論以公君心以正在外則民瘼必
瘳吏姦必竟及謝事而歸也播紳有所楷式鄉黨為
之廉靖年登九袞在宅人可以優逸而公愈老而愈
謹其待人接物雖少賤而不忘其高文大冊筆垂絕
而尤勁威儀之抑文章之盛衛武公之傳殷實古今

之寡並 皇上御極丹詔屢致公以老辭春隆無替
界公內祠公守愈勵曰在先朝已謝其事上方有所
咨訪公亦密進忠言天下陰受公賜今其已矣蒼生
為之涕泗某之先公泰公事契累世交好父子兄弟
矧惟不肖被公引汲深愧頓頑莫克有立以病卧家
破詣無及抱恨終身神馳足繫欲遣弱息往哭總筵
効官有嫌不敢輒前一卮致奠有淚如泉

又墓祭

公胚胎河陽之間氣接踵中原之盛時忠孝名節相
傳四世至公尤正大而瓌奇其問學淵邃群播紳而

莫之儼其文章典雅凡士子以為之師其危言正論
累朝之築石其明智遠識華髮之著龜其入告也足
以格君心而綿國祚其出治也足以革吏竇而滌民
疾粵自弱冠收科第至年開九袞而譙恭執禮瀕死
而不哀自親親仁民推而及於鳥獸草木無一不用
其惠蓋如景星鳳凰見者知為美瑞和風愛日被者
無不欣怡昔楊綰馬公居相位未幾而天奪之速民
至今涕泗而齋咨公負二公之望過二公之壽不便
一日居二公之位以佐天子司其責者云誰豈斯民
之無祿抑直道之難施也耶某再世辱知閱死生而

縶縶兩年破帛窘疾病之支離扶憊而前絮酒炙鷄
懷千萬而莫吐繫一二以陳詞嗚呼先生永已更幾
百年乃復見之

南康祭劉屯田祠

某晚末庸陋乞守此邦實慕人物山川之高致到官
之初早歎適值才疎力短寢食幾廢之上元之朝始
克祇祀惟公三世文行俱至玉雪其清照我肝肺道
則不逮敢忘瞻視三酌寒泉薦此誠意

祭李侍郎說

惟公正直明允洪大謙恭雲龍之嫡卓有祖風纂承

前光學問自力淵手群書渙若鉅筆散歷中外所居
者稱建事立功一本於誠在家克孝移君則忠一介
不取峻其垣墉西清近侍獻納論思蹇蹇立朝無分
寸私逮溪桂府民思遺愛筋力未衰毅然早退黃金
帶婁逸琳宮一第不華僅成於晚年未七十優游燕
居觴詠一年左右讀書不聞屬疾遽棄人世精神凜
凜孰云隕逝善人云亡為國歔歔某素辱眷愛聞問
怛驚義當往哭疾尼于行緘詞致奠有淚如傾

祭三山陳郎中孔頌

公之高才敏識超出一世雄文勁筆追配古人名師

蚤拜誼詠道真脫獨有見所寶在身者數厯之偉績
亟退休而燕申壽考幾於八袞康彊如同一辰何徵
恙之不除遽長往而為神豈捫生之有憾抑厭世之
膾腥某少年陪誨脫荷相親久因病而疎問積悃幅
而莫伸暨令子之為郎辱受塵之一詆受一門之厚
愛倍傷但於常情敬薄馳於奠酌詎少盡於哀誠

祭福建譙漕念憲

嗚呼我公人品絕世律已以廉養民以惠爰自卿月
出移使星吳楚之壤籍甚政聲越在江東所活萬計
仁人存心遲恤謗議竭來吾閩軫民益勤捐金發廩

肉骨起人某兩趨下風洗手奉職賴公之知是式是
力天胡不慙喪此吏師鰥寡孤獨遽失所依望柩滯
若豈私其哭萬古一朝其人如玉

祭南康軍趙知宗伋夫

惟公繼繼名家振振公族位三達尊脩九五福滿屋
簪紳沾堦蘭玉羨垂車之新榮何屬纊之遽速某假
守鄭鄉分光隣燭清酒一酌有淚盈掬

祭南康涖畧趙郎中

惟公問學淵深操履純固在家則孝敬以奉親出仕
則忠清而致主葦簞蕩節惠陟數路以近宗名相之

子被服有過於儒素世有一善皆足以成名公爲人
之所難不可以枚舉而計數其於利祿之場蓋中流
之砥柱雖功業不足以動其心豈萬鍾之屑顧求清
閑於未老方深樂乎止足之趣備此全美宜享遐齡
何申子之未周遽蟬蛻而聽度某夙托契好每慕高
誼劾官郡郡書問再致忽聞凶訃潛然出涕職守所
拘無由造詣一奠寓哀鑒此誠意

祭南康趙知宗

某之始至公出門迎笑語怡怡今某之歸公顏如丹
深藏總惟兩年辱愛葬不執紼寧能不悲薄奠在前

公其為某舉此一厄嗚呼哀哉

祭李尚書

惟公行純德脩能鉅材全著績中外垂六十年脫歸
里第進退卓然生榮死哀復何憾焉歲在丁卯公帥
全閩某官宗邵贊泰趨承公謂可教薦之曰能官滿
調進公掌銓衡問學甚寵有意提携忽叨奏即適值
明時公以為喜顏欣色怡三年末綴寵待不哀別公
還家竭耒廬阜公以書來示我求去遺之書籍編宏
冊鉅感佩迄今弗稱是懼述公之歸某適西還道出
錦里可謂承顏忽聞公訃涕淚俱潛一厄欽莫莫寫

悲酸嗚呼哀哉

祭福清林經略

惟公正直剛毅溫恭寬裕學問得簡肅公之親訓政
事踵簡肅公之世官自少時已韜藏其器業迨中歲
始奮飛於羽翰容臺棘寺挺挺朝著湖湘幢節忠勞
備殫成先志昔日之所未遂使遺愛益為吏民之所
嘆焉帥番禺寓直道山抗疏辭榮人以為難引車還
家耒耜老能閑徜徉泉石四五年間去歲拜兄顏渥於
丹意胡考之未艾何不疾而大還生死大變忽若向
晦而暮息有識之士孰不駭怛而悲駿況某等情均

弟姪誼重丘山行將往哭姑寓一奠於如在之顏烏
呼哀哉

祭泉州楊尚書炳

惟先生以淹該之學為典麗之文以純懿之行為搢
紳之式蚤掣峻科晚登要職南臺駢省文昌八座曾
不足以發其抱負底蘊之萬一權姦用事禍幾爰見
幾翩然賁勇莫及雍容田里左右詩書謝事杜門以
靜自娛有子克賢不仕而養年至八袞康彊無恙一
日遽逝孰不驚愴嗚呼哀哉某忝辱段茅嘗蒙薦拔
凶計忽聞倍增痛怛一卮致奠絨淚往達

祭泉州儲經畧用

惟溫陵之名郡為賢士之淵藪既稟氣之殊異亦受
祉而獨厚位必至於公卿壽必逾於耆苟胡造物之
不齊於我公而則否惟我公高明之智若皎月之昭
哲寬大之量如長河之浩渺規摹則卓犖而宏闊志
則謹微而勤小殿襄陽之巨鎮宣王明於遠徼真意
實德孚乎田里鰥寡之心仁風義氣徹乎穹廬沙漠
之表謂我 宋之有人婉楊公而遠紹袖手還家載
色載笑曾不三年 天子有詔俾鎮南海壽我開天
護十四州之民若乍得乎杜君疾既愈而復華人欲

其生而昊天不弔豈時數之使然雖天亦不能曉也
某素辱眷顧聞問但驚義當往哭疾厄於行緘詞致
奠涕泗如傾

祭李縣丞元宗

惟公少出華胄得雲龕之文錄早從名師承考亭之
誨規抱五十年之蘊蓄見一二政之設施人所歆為
而不能者皆力行沛然而不疑善政在人班班可知
某久辱垂顧晚尤不遺命賢子以來教盡朋友之切
懇聞微悲之將愈俄親蹟而告辭以托孤而見屬滯
涕泣之交頥顧某哀陋其若此敢不勉副於待期一

卮致奠神其鑒之

祭外舅龔汀州文

惟公胄胎前光佩服古訓孝法曾參謹侔石奮事親
盡道廬墓三年宰邑惠愛鰥寡賴焉累佐名藩守帥
嚴憚剛正不擾民足官辦武岡為郡徭徠難馴惟介
惟和秋肅春溫年甫六十得郡鄉部送吏將至求閑
抗疏家雖公衮身則儒素先世田疇僅足無餘官居
五品可謂顯榮壽七十一可謂令終十載家居俯仰
無愧均曰天賦由人真脆某童稚通家壯忝子壻教
誨是承矜式得誼一觴致奠橫集泗水

又路祭

嗚呼公之事親誠孝貫於幽明公之蒞官忠廉信於
蠻貊胡利祿之兩忘惟退閑之一得閱詩書以自娛
閑老釋而不惑年未及期位不稱德天之報公予以
兆宅蔚崇先之佳城豈人力之能擇送輓車而就葬
積陰雲其如剗雖衆願之未償信天意之不忒感舊
傷懷心焉如坼

祭仙遊陳侍郎謚

公之清文奧學足以黼黻皇猷碩德宏量足以鎮壓
浮俗早登科級遍歷華途烏府臺頌人共稱其清直

甘泉法從帝質賴於論思桂冠以時徜徉泉石翰墨
詩篇人傳為寶笑譚觴詠孰覺其良年將九袞一疾
遽傾海內之士莫不為之咨嗟而涕淚某等忝同里
閭辱愛門墻馳菲奠以寓哀冀英魂之垂鑒

祭鄉守王郎克恭

惟公稟姿凝重制行端方蚤舉科第晚始為郎再館
郎符未殿鄉邦甫及半載仁聞四揚鄰寇繹騷先事
隄防募兵築城愛民恐傷遽以計告行道怛驚某等
方依鉅庇忍莫盱觴慨百身之莫贖徒竇涕以霑裳

祭鄭道州守仁

惟公詩禮素習蚤承名父之訓德性內溫溫然君子
之容在家必孝蒞政必忠未邛磐宗或蔡或貳雄藩
大郡或揖或通居多問望綽著事功瞻舊秦陵之嘉
郡昔必畀於名公喚新命之始下爛金紫其在躬胡
薄疾之不愈遽翔雲而逝空某素忝親契久濶過從
忽舉觴而奠輒滂涕淚以霑霄

祭王侍郎居安

嗚呼先生稟天台之間氣為我宋之巨賢蚤魁天下
勇退壯年文章政事衆美兼全求之古人孰後孰先
我 寧考之當寧開正路以招延方權臣之得志衆

棲附以慕羶先生獨淡笑以畫策殲群姦而晏然乃
絕口而不道指故山而不退竣玩空諦以自娛遂委
身而任緣帥閤五載屹若山鎮還第三日俄而蛻蟬
嗚呼哀哉某賦質庸鈍獨荷春憐扳晚末以同升駭
衆聽而喧傳嗟受知於二紀曾莫効於一言痛夫子
之既往雖有善而誰甄趨總帷而一慟慨路梗而莫
前緘非詞而致奠空有淚以如泉

祭柯縣尉夢得

季夏之末公赴制幕錢公于郊卮酒笑謔別未兩月
公卒於旅我聞公喪駭怛惻楚廬山之陽我適試郡

奔走後時疾不及問今茲始來獲拜公柩綿薄粗殯
有慙往救朋友交賻衣棺華好有子勝喪安安即道
命雖未達不朽者垂可以無憾人又何悲蓋公之才
足以經世德足以善俗而又昌之以詩百一未試遽
止於斯此朋友所為齋咨涕洟者也公之家事朋友
尚均任之靈兮如在知此言之不欺

祭三山許郎中錫

惟公儒林宗匠昭代哲人恕以接物敬以持身麾節
所至遺愛在民歲次丁卯遊官三山與公為寮詩酒
往還愛我誨我以敏庭碩丙子之歲我將去國公八

為郎正論蹇諤勇退莫晉徜徉林壑歲月幾何書一
再通踰七望八健躬粹容何恙不除竟以告終一卮
致奠灑淚西風

祭廣東鄭提舉起沃

惟公德行才華見推時輩寬洪溫厚綽有古風少登
科第蚤著民庸兩罕劇邑剖決雍容晚歷麾節盡瘁
匪躬歲在辛巳效官延平公贊同事義均弟兄誨我
以義惻怛至誠一別七年書不厭頻廣東千里棠陰
百城二難之澤數世不泯如何不淑大命以傾一卮
奠榘莫寫哀情

祭南康軍詹簽判

惟君詳練明敏厚重寬洪軍縣于閩有循吏風來此
佐郡剛柔適衆恬靜不擾政亦告終某實忝同寅久
辱規範郡每仰成坐以無事聞君之疾僅一再詣意
謂壯齡旬浹即起云胡不淑遽心於此文以侑奠有
淚如洗

祭白鹿書院黃堂長去私

某先公正獻分閩江右實淳熙之五稔朱文公先生
以書見屬謂江右舊多文士而近歲以來行誼志節
之有聞者亦彬彬焉數輩俾先公取其彊明行正直

者以自輔而表其篤厚廬退者以厲世是時已知臨
川多君子而未見所謂卓爾聞道之懿厥後如君從
學文公刻意勵志取友必端講學必至黃先生每稱
學者則以君為敬畏白鹿之師必君選翼有德有言
後進所企右史真侯潭湘是帥嶽麓謀師以禮招致
中道而歿學者喪氣何吾黨之甚哀而斯道之多躓
耶某忝交遊八年每荷教誨謂大節粗知所向而事
之小者率多乖戾退自脩省惟惕惟書罔未報計
已候至感傷訓言潛然出涕一觴致奠歆此誠意

祭南康余堂長

惟君稟資端重度量裕如蚤得師友教授鄉閭德行
兼茂學探泗洙卧病在家天其舍諸我來試郡實仰
楷模力疾訪我論偉貌癯為信宿晉遽曳歸輿方圖
解綬復拜君廬云胡不淑素志頓渝一厄致真有淚
如珠

殯祭孫權尉

繼君忠信誠懇詳練通敏頃在淮壩嘗為勉齋黃先
生所任厥蹟甚偉比來歛浦暫權尉事出入山谷遂
以病告食不足以活其眾僅心於此可哀也已權殯
茲山以竢及葬靈其有知當聽此言嗚呼哀哉

祭龔知縣日款

惟君生于華胄自奮儒科行脩于家令聞孔多年近
五十通籍金閨宰邑于潭民謂毋慈刺史既病同蔡
弗靖遂以甚言罔上之聽君不與辯還家怡然一年
有半疾遂糾纏藥石已殫命其不延無愧于人命乃
在天君之剛直可居給諫始三十年任始五轉所惜
者時與君何怨與君親友自少至老暮年心事待君
傾倒如何願非有疑莫告文以脩奠詞淚俱墮

祭龔承奉

子之祖父忠孝世載是生賢子聲聞日大遜悌淳明

即之可愛如何天喪伴我驚駭嗚呼哀哉歲在戊辰
與子西征兩月同邸飽聞德聲或求龜策或問形色
人皆子期仕則顯榮天理人言胡不足憑子之計至
我役未歸過時既久書問亦希子如不棄其知我悲
我之中兄以女妻子聞子之逝悲嘆至死歲晚奔喪
暫還閭里卮酒薦哀子胡不起

祭聶司理

惟兄天姿明敏加以學力卓然有成人所難及莞醺
廣府庶以濟勤司行英藩利澤孔殷上官刻薦多士
推予日侯造朝陞華省府如何不淑遽得凶訃嗚呼

哀哉某戊辰之秋與兄過於都城把酒笑語意氣如
傾別才半紀遂隔幽冥我念諸舅有子唯兄積善若
此亦隕厥身夫婦俱逝禍則甚慘莫知其繇唯遽傷
感卮酒薦哀靈其來鑒

祭兄祭議

維兄稟德純厚賦量寬洪湛泊自娛不志于榮年
至七十愷不形如玉斯潔如水斯清撫愛宗族曲盡
其情我誨我勉冀我有成訓飭之恩恙父是并去歲
之抄我哭中兄王事有期奔走東程拜兄于堂相弔
失聲別未幾旬不聞疾嬰忽以訃告惻然痛驚慟哭

連日身為不寧。一病累月羸軀惻惻。既而積雨縣治
頽傾。度亦伐石半載。經營及此。中冬未輟。丁丁聞兄
出殯。心飛足縈。拚坎有日。當走幽城。卮酒奠柩。姑薦
哀誠。

祭仲兄巨監

惟兄以寬弘之度。濟剛直之資。忠孝之訓。風稟於父。
敬恕之道。又得所師。年少蜚譽。考孝所知。宗正外府。
伴屬伴裨。悉以公選。不專父私。兄克奮勵。報稱是期。
清漳臨汝。廉介不欺。歷事三朝。靖退自持。二紀郎省。
嫺巧所嗤。末乃一陟。人皆謂遲。兄曰。何能過分之宜。

蓋六受郡而兩上三乘輅而一馳信直道以力行豈
畏途之足危惟坎凜以濡滯斯行誼之不斷方湖湘
之始寇誠牙孽之易治及威惠之兩失遂厯歲而蔓
滋初抗疏以請討曰紀綱不可以隳值時論之不然
謂居職之非宜奉殊選之香火伏園閭以恬嬉荷國
恩之邛隆畀符竹而不遺暨入彛而忽疾猥剴切以
陳詞何好善之不足恃遽一病以顛隣嗚呼哀哉某
幼失父詔兄訓是資鈍頑於學倍費耳提日異春容
考質所疑春風月夕疑奉酒卮此志一失永無償時
南北間閼天胡不惡病不視藥飲不憑尸負此大恨

中心冒夷號慟以奠靈其在新

祭族姪念一郎

汝之明誠謹厚族黨所推稟賦不薄操持復正宜壽
而謬殊不可曉汝之老叔宦情素薄志在丘園一官
束縛每以家事唯汝是託方將丐歸與汝相從於水
竹之濱耕先人之舊田吟詠風月以畢餘年豈意人
世如此不足把玩也聞汝渴疾比歲已損書尺尚新
愕然計聞隔絕二千歛不及時葬在何日於呼哀哉
汝之長子尚能保家我即得歸以撫以誨汝如有知
來歆我祭

改葬祭前室梁安人

惟嬪孝於其母不忍違離頃葬于泉以奉母慈山深
地迥人跡罕至瞻顧者怠幾至驚悸宅鄉異郡每懷
感愴十有七年始克改葬陳岩山之下山川如抱入
茲玄宅永保安妥尚利後人康寧胡考

祭本家祠堂

惟我先祖積善成家惟我皇考乃相重華國恩既厚
報稱未涯唯是祠宇歲久歌邪爰易棟栊風雨用遮
四室同堂匪儉匪奢消吉告成承祀敢譁曰子曰孫
恭敬彌加祖考來享錫福孔加某猥縻職事莫奉鱣

鈔緘辭以告靡間邇遐

祭廿四兄嫂改葬延壽合祔

嗚呼惟公天姿既高力於學問辭官不受壯年好遊
惟嫂懿行天得孤潔而順孀餘三紀禮法是徇兄葬
已久茲焉改卜嫂始合祔郡交之北並賢範美瘞此
雙玉家族楷式云胡不哭文以侑奠魂其來讀

祭淮寧郡太夫人林氏

孝友之世天既開祥累公累侯日未熾昌篤生夫人
志紹厥祖其在父母恭順以處既得所歸克相公輔
有翼有嚴無怨無惡歲時敬薦命服煒煌內勤于家

外助于邦中年自力益大德門朱衣銀魚令子聞孫
其爵維何十國孔多其壽維何八袞孔遐晚歲康娛
湛然一室耳目聰明遊觀則弗綵衣鼎盛將萬石君
文駟雕軒駭瞻聳聞云胡不淑一疾而傾老成耆舊
益遠典刑嗚呼哀哉某不肖小子童稚升堂因緣泰
竊宗黨有光賤職所縻莫送靈輶絨綈俯觴淚涕交
頤

祭鄭司令母潘夫人

古有大訓惟易與詩衆人采蘋規範且垂溫溫夫人
生長儒門濡經染史古道是遵篤孝舅姑娣姒取則

戚疎婚嫁靡求不獲夫負大名人士所歸拔貧治具
有順無違雄藩帥聞文駟雕軒未啓國封胡逝九原
昔魯伯姬三國來媵遙遙千載賢蹟與並孰謂幽閨
邈乎瞻聽刻銘山河後世起敬

祭真石史母吳令人

嗟嗟夫人正節淑行式今儻古蚤為義婦晚為慈母
教子為儒溫飽匪志麾節所臨數世其惠江右一道
大邦維翰得人為重國勢鞏安大纛雕軒來曾幾時
湖山晏靜庭闈遽悲民愛其子若母其母丹旆就塗
孰不痛慕天佑善類以澤斯人云胡降禍使辭不伸

某忝與令子末綴簪采升堂久闊總惟奠拜絨綈致
奠洒涕傷慨

祭台州趙司直荅人

嗟嗟夫夫人幼承祖訓內則備聞長適宗英禮法是
循夫賢子秀縉紳共嘆寡居未久天復降艱凡託姻
契孰不傷惋千里致奠遙涕總悞

祭龔令人

嗟嗟夫人懿德孰倫生于相家早媿德門侔哉鄭公
剛毅篤實出使立朝蹇蹇正色夫人內助以成德
惟義唯順宗黨是則教子用嚴父師其職始筮有稱

薦書交陟方期就養知命不出不疾而化親戚傷盡
某於夫人妻黨之尊戚此盛美而不久存千里致奠
有淚如傾

祭安溪橋緣二道者

維道者竭力興梁不憚險艱殞於非命孰不永嘆人
於施財或以爲病爾身不恤尚何所吝苟濟於衆雖
死何悲文以侑奠有淚交頤

祭前臨江方通判阜周

惟君孝弟睦姻和厚恭謹少掇科第泛官炎嶺戶掾
縣令施設詳整再宰南安惠浹閭井既佐名邦復貳

郡政不斂于榮見稱恬靖還家遲次娛親宴飲不聞
屬疾遽成長寢我辱親契相愛殊甚千里寄奠有淚
如瀟

復齋先生龍圖陳公文集卷第十九

祝文 青詞 上樛文

安溪到任謁宣聖

某自能勝衣冠佩誦學道愛人之語今始獲行於一
邑惟道無窮力不逮其敢不勉以無負先聖之訓禮
愛初謁用以告虔

歐朱偕從祀

某等邑逾年視此邦士行彬彬濟濟思有以興起其
心期底前脩之盛爰故昔人有所謂鄉先生可祭於
社與夫釋奠必有合之之義竊謂此邦之彥鄰郡之

賢在唐則有若歐陽詹者孝弟之行足為世師近世
朱文公熹發明正學使聖經賢傳燦然無疑厥功茂
焉洎日之良並陪從祀使學者因二子之所成就以
造夫子之淵懿豈不偉哉

安奉歐陽四門祠

先生之道由孝弟以至仁妻子信朋友先生之譽由
閩越以播江南籍甚於京師發身僻遠之鄉尚友命
世之傑故能行為世法文為世師後世謂閩人之舉
進士必以先生為稱首前豈無人獨推先生者蓋所
重在此而不在彼也某鳩來此邑先生之族實居焉

遐想清風慨然慕歎像而祀之俾學者知所先後以
自強焉

安奉朱文公祠

宋得奎瑞以文為治周程挺生傳道之秘始開其端
文則未備篤生夫子妙齡卓異積學五紀不怠厥志
詩正其外易祛其蔽大學中庸魯論孟氏章分句析
研辯盡意通書西銘用開精粹下逮屈韓亦窮厥旨
晚而著禮歌範斯世七十有三死而後已視彼前脩
或鳴一藝尚列祀典矧此全美昔年少數拜而而侍
恨不能學徒仰遺軌祠之學官與眾慕企有書可誦

有像可視更千萬年孰不興起

到任謁諸廟

某學未聞道天子不以某為不肖使宰茲邑黽勉承
命日夕震惕靖惟民情吏姦莫究莫革智所不及神
其相之背公營私貪以害民神其殛之初謁有嚴用
是告神

清水巖祈雨

某德薄宰茲邑兩閱月矣天久不雨民沴物瘠乃十
七日辛丑禱於山川城隍之神越夕雨作輟止邑人
咸自故事善利大即其生也暴身致雨今禱者必之

焉伏惟大師願力宏深邑人敬向令敢不先期齋沐躬禱祠下其施甘露以蘇民物以答邑人之望則大師永為邑人依歸

清水巖謝雨

某以民告旱將以二十三日躬禱祠下乃二十一日為文一通遣吏齎香先達此誠大師靈明如響斯答香信方馳於巖寺陰雲已遍於郊垌霖霖滂沱民蘇麥秀百里之內童叟歌舞嗣歲又將有望躬造巖宇轉祈為謝焉

祈晴

惟師靈明邑人敬鄰雨暘之禱不宅之而之師豈其
生也有濟人之大德死不朽乎邑多山田當此梅雨
固不多厭而滂沛兼旬秧之秀者將腐夏既至矣種
不可以復蒔則雨之為害甚大師之福此氓也呼吸
而雨豈能雨而不能晴耶掃陰雲開皦日惟師其速
圖之則齋沐以為民謝

謝晴

某以淫雨為災縻於吏事未能鞠躬禱祠下為文遣
吏以致此誠使方出門雲陰頓解皎日鮮麗舉邑如
痿者之得起何其捷哉何其快哉伏惟大師惠濟此

方德大恩深永億萬世虔奉無忘令其敢不敬謝祇
拜慈像感歎何言

又祈雨

某不善為政雨暘必待於禱亦有罪焉大師靈通應
答不爽豈固違吏之罪實慈愛農民自春以來雨膏
土潤早禾秀茂正茲展穗無旬不雨農已病之苟不
先時以告懼將無及伏惟一灑甘雨俾高無苦乾則
豐年之功允有所屬敢不齋戒謝焉

謝雨

民以久旱致禱於師師慈愛民應不移時言脫於口

陰雲已馳自朝竟夕膏澤四垂百穀奮張可保無飢
惟師之恩廣大莫窺欲報無所聊陳此詞

又祈晴

五月之抄禱雨應期今已蕪旬雨猶未止百穀需渥
譬之飲飽將有不節之嗟伏惟慈惠一方民之欲賜
以時暘則豐登可必況此垂成之功其忍不終惠耶
謹齋心以俟

謝晴

乾則潤之溫則燠之熟者穫之秀者實之一飽之恩
民知有自今又將逃罪敢不致私謝焉

又祈晴

某治縣無狀蒙慈惠昭格雨暘以時今禾稼如雲而霖潦不已終歲之惠懷於旬浹可不惜哉伏惟顯賜佳晴俾遂刈穫以全豐年之慶一邑之願抑亦大師之願也

謝晴

今歲豐穰以雨之故踰旬不止資者以孽民甚病之乃十日己丑遣吏致禱應答不爽積潦之中陽烏間出越二日大晴邑人鼓舞聊陳菲薦用報鴻私

又祈晴

入春積雨初以為常麻麥既壞室廬亦妨嗟民何辜
漕此沴殃惟令之臯政治不良令之德既不能召和
大師之力足以捍患惟矜此式民賜以佳晴令則齋
洗以謝 謝晴
淫雨之降三旬不止麻麥被害環數百里冒然有禱
寸誠足恃誰謂天遠曾不達咫尺大師之靈振古莫擬
文以侑薦傳示無已

又祈晴

春夏以來雨潦過多二麥告病已不及事地瘠民貧
藉穀麻以助不給今者連雨又以病告若又不止早

禾亦將無望伏惟大師慈惠此邑其忍不救哉適邑人迎像于茲敢率官僚祇禱座下惟昭答焉

謝晴

昨日以久雨不止有傷禾稼投誠控請陰雲隨斂秋成可望民物用蘇敬致微誠式陳菲薦

又祈晴

比以田疇苦雨禱于巖下已而浸淫不已九穀用傷甚至洪流暴湧溪田衝決一邑之民連年告病吏之不德咎止厥身民則何辜罹此困苦痛瀝丹誠一意致告伏惟仁慈惻然賜鑒

謝晴

某為縣無狀尚道刑僂天實厭之春夏以來淫雨為害屢禱屢答顏汗心慚今者日光穿漏晴意已回如是旬日百穀少蘇非薦虔報併有所祈尚惟昭鑒

又祈晴

今年以來雨潦過多前此屢扣靈明蒙應不異既而晝止暮作不至為害今晚禾方穗震風暴雨摧而偃之民本貧窘麻麥早已少收今此晚禾性命所係雨更不止其將何以供伏膺奉租稅此皆吏之不德獲罪於天不即其身而監及無辜之民慚痛何以借喻

亟控危懇仰瀆慈聽亟賜時以蘇百穀

再祈晴

某治縣無狀天降之災乃五日戊寅颶風暴雨拔木
發屋示稼偃靡屋廬漂蕩民實無辜濫彼茲罰倘不
援誠祠下冀得佳晴某亦何面目可見百姓昨日先
遭吏致禱陰雪既開晴意未固伏望力禦大災以活
民命則大師永無負邑人依歸

又再祈晴

入冬以來天久不雨麥茁未秀鴈首連雲數十日不
已麥則秀矣小民方祠此隙販負奔走求斗升以為

堽戶卒歲計沾體塗首情則可念蕪縣治自秋營建
及此未畢工徒亦以病告伏惟昭明響答俯徇人欲
以回天意

謝晴

昨日之禱誠率爾也雨雖踰旬農未病也逐末之民
視宅邑則無幾也工徒之妨不足深恤也某乃有請
應亦旋至豈大師以晉濟為念今雖私禱一毫有闕
於民亦必聽也齋洗陳奠報明德也

又祈晴

某來茲三年麥始一稔可謂不易得矣數日以來爾

暴如注熟者將腐則是大師三年亢吏恤民之功壞
於垂成可不惜哉某齋祓以俟其錫以佳晴俾及時
而獲則吏與民皆受大師賜舉向之所不足者一愿
於今日豈不偉哉三日晴然後詣祠下謝焉

謝晴

久雨妨麥遺吏致禱謂非三日晴不可以獲晴不固
不可以謝神之愛民既不渝約吏為民謝其敢後期

又祈雨

今歲雨暘順序豐稔可期皆陰相默佑之功旬日以
來赫曦隆暑田畝苦乾當此之時需然一雨嘉穀奮

茂為惠益宏況雲連日陰雲閣雨不下尤易為力遣
吏致禱伏惟響答以寬吏民之望

謝雨

不雨未踰旬地瘠少腴驕陽燥之廼升日已丑有禱
即日雨越一日復大作膏枯濯熱惠利宏深躬詣祠
宇答靈貺焉

又祈晴

日者請雨膏靈隨之無旬以來沾渥不止念今歲蚤
禾熟於常年雨不得獲實甚可惜伏惟願力宏深開
晴卷靈以全造化之功惟吏與民俱受終惠

謝晴

雨以久告秋陽杲然其答如響民信益堅某以病恙不能詣前緘辭侑薦遙致殷虔

又祈晴

中禾栖畝且割且獲西津興梁徒役交作雨連不止二者告病吏賁不德不敢憚勞馳香乞靈以全稔功惠利之深曲成善應

謝晴

昨日以秋雨暴作為害昭告靈明畋日清風應不旋踵吏民敢昧大賜菲薦報謝詎盡鄙誠若夫佳晴月

餘使農穫工役咸遂所願又終惠也敢并以請

又祈雨

蕓旬以來氣暄異常人用不康麥不得下久旱之故
宇人無德將去獨不能召致和氣慚對吏民伏惟注
以甘雨蘇其病活其飢皆今日賜

謝雨

旱暵既久民物俱病丙申有禱丁酉而應轉煥為寒
不僭厥德或曰雨少恐氣之凝既越三日徹旦而傾
土潤於膏民氣益醒今當告違不敢再詣爰屈同僚
以致報祭

任滿辭清水巖

某試邑三年才德俱乏唯有寸誠曲蒙昭答今將去
此實懷大惠躬詣祠下用告違離前月以來晴既足
以迄穫麥未入土時雨稍愆因致私謝復有所祈不
爽惠慈尚加鑒相

諸廟禱晴

某德薄政疎無以召致和氣入夏以來淫雨不止九
穀用傷民貧地瘠深可憫惻伏惟嘉惠斯民轉陰為
晴伴有秋可望皆神之大賜

又諸廟禱晴

今年以來雨潦過多晝止暮作為害尚淺不敢數告
乃五日戊寅大雨以風拔木發屋禾稻漂流而雨猶
未止民既無室廬以蔽身又無穀粟以充口神以訖
民為職猶吏治此邑也吏之不德罰將及身神之聰
明寧忍坐視而不救惟速賜昭答以格和平吏將為
民謝又得以拜私惠焉

又諸廟謝晴并致禱

日者久雨田或苦濕乃望日乙卯有禱於神神鑒其
衷翌日丙辰晴空豁然物得蘇醒後三日將致謝屬
部使者檄詣行司不能躬親執事既歸始得伸敬連

五日雨又不止恐復為害謹率同僚分詣祠下以謝
以祈式昭顯惠以志不敏

驅虎告諸廟

某繆政初無以格物踰年于茲雨暘以時人免疾沴
皆大神府庇數日以來猛虎為暴近在境內樵牧被
害邑人不遑寧處夫陰福潛加而顯禍未去曷足以
彰神之威靈惟神其驅之使深藏遠遁踰伏窟穴其
或不聽縣令則慕善射者操毒矢以從事神之叶力
期於盡殺乃止如縣令貪刻所致神其罰之毋貽害
於百姓

社壇城隍祈雨

天久不雨地氣枯燥當寒而燠民用疾殃惟興雲致雨境內山川之神資司之縣令德薄政乖無以召致舍神焉告惟神愛民答以甘澤俾麥蘇土潤人用和平不獨縣令可以逃罪神亦無曠乃職

祭縣治告諸廟

某非才試邑將及兩年未以罪去繫神之賜惟是縣治頽圯莫敵風雨吏不忍坐視其弊謹身節用謀革故而新之市材募工一毫不擾於民乃以八月十一日始事惟陰陽之拘忌有非人力所能及者神其麻

比俾民安而吏亦安敢不知所自來哉

辭諸廟

某學不足以予民徒有此心始嘗質之神矣營私徇
欲固所不敢而賦性麤率格物不至乖政繆令往往
而有其可以與神之無罰乎今戍期已及民安穀賤
吏遂逃責則皆神之太賜也酹以告歸且致私謝不
敢有祈惟神之靈尚永惠于茲邑

安溪任滿辭宣聖

夫子有訓道之德以齊之以禮有耻且格某服膺斯
言久矣及來試邑身既不能率人教又不足喻下三

年之間必其期會鋤其強梗此刑政猶未能庶幾夫子所言之萬一況德禮哉強顏告歸請事斯語庶它日復有以拜夫子

南康謝雪

某治郡無狀籲天有祈蜚蜚誠微乾坤應速六花獻瑞雖未遍於里閭三白呈祥竇屢陳於巖谷恩由天致責則吏逃敢忘敬畏之心更望霽霽之施

祈雨

天憫去歲之旱民沾危亡春夏以來五風十雨早禾已遂登塲民方少蘇旬餘烈日晚稻恐以病告伏惟

豐穰之功難成而易虧繆戾之政可罪而民不可以
屢困齊心虔禱冀獲感通需此膏霖迄成稔歲

又祈雨

某到官之初適值旱歉去歲一稔瘡痍始瘳春夏以
來雨雖過多時暘復應庶幾再稔少蘇田里今早禾
已登場中禾亦已有望唯是晚出之稼螟螣食之伏
惟造化之全功虧於一簣豈吏治不平之咎耶然吏
實可罪民實可憫一雨餘蕩潛消陰弭不獨民受終
賜垂去之吏實與受賜焉

安奉周漁溪朱文公二先生祠

惟濂溪先生開道之秘始于文公先生斯文始備經傳開明垂淑萬世曉此星諸曰守二公百餘年間風教邇隆顧瞻道德廬嶽並崇我立此祠實仰前哲有不如訓昭著森列敢不夙夜景行遺烈遠通多士濟濟來觀是式是承大法是閑風俗丕變懦立薄寬庶無負二先生之教而皆君子之歸新宮屹然孔聖是依一後一前蔚乎相輝牲酒跪薦其敢不祗

安奉改造宣聖像文

乃者文公朱先生講明古禮於聖像跪坐奠饗之儀尤欲其當歲在丁丑文公之子來守是邦述父之志

有請于朝欲以文公向時之所討論者而更新之俞
音特允通於治歸未及舉行某適繼其後謹遵其儀
式而改造焉顧茲重事敢不率僚屬諸生以告

告脩設廳

郡治廳事歲久頽圯枝梧者又數年矣吏不容坐視
消吉葺治易而新之惟茲役甚大人之所可為者吏
敢不勉惟神相之俾役徒安安則吏受神之庇亦大

謝脩設廳

春首以脩設廳之役告於明神閱三月始竣事工役
帖然實出庥庇分遣同僚告謝祠下薦以牲酒脩以

音聲

告立木柵掘塹築牆

南康為郡面湖負山藩籬不設民心靡固某來此半載嘗請於朝矣賦入希少有負初心今茲邊鄙多虞愈不可緩鑿池築垣植木為柵以禦寇偷守土責也消日興役敢用虔告

南劬春祈諸廟

去歲民罹災害田穀少收豈吏不恭所致今春雨暘粗順吏敢不齋心敬德蠲潔牲酒用薦祠下惟爾有神念民生之不易弭息疾沴驅除姦賊使田里安妥

年穀順成神亦血食無愧

秋報諸廟

某猥以非才去冬濫承人之適值旱暵民不聊生今
歲夏秋禱雨者三皆蒙貺答五穀胥熟遂成有年神
之惠此民可謂至矣牲酒潔清侑以音聲用伸報謝
尚冀終惠使田里和平盜賊不作吏亦永永承祀有
敬無怠若太守不職營私害公神明殛之毋爽

告譙樓揚州額

某猥以非才叨承劇郡顧瞻州額缺焉未立無以填
安茲土民用靡寧謹揭而新之惟爾有神尚相此民

俾壽而康年穀順成自今以始

青詞

南康祈雨

薰旬不雨未應遽叩於九閭去歲已飢豈可復罹於
再旱輒抒田中之懇冀蒙從欲之仁伏念臣某承乏
宰民無德及物適繼薦荒之後每深震懼之懷荷上
帝之垂憐軫下民之久困既蒙雨若可望秋成忽驕
陽之致愆將盈月而為沴僮後時而有禱必貽悔於
將來用是矢心籲天為民請命伏望為霖三日勃興
向稿之苗遍澤十同終保垂成之歲

又祈雨

失時不雨敢自安涓日籲天遂成再瀆賸茲星星壘
婁厄旱災方稔歲之是期忽踰月而可慮晚禾告槁
新麥未施職在收人惟有震驚而請命罪實由已寧
甘殃疾之及身雖已丐歸尤深軫念高穹感格沛為
三日之霖大惠始終滿此九農之望

祈晴

去冬旱槁方欣雨雪之及時一春浸淫深慮來年之
致害用敢先期而有禱庶銷後悔以無殃伏望皦日
顯臨靈雲頓解少收霈澤晉為梅月之霖大慰農民

先拜麥秋之賜

謝晴

久雨妨農方仲誠禱佳晴宜麥旋獲感通仰大造之
至仁俯微躬而增荷敢不益勤於脩省庶幾少答於
靈明

祈晴

時雨久沾已滿農民之望早禾方長深虞水潦之災
功豈出於化工咎實由於吏治敢伸虔禱冀格幽聰
亟賜佳晴乞成豐歲

南鋤醺懷疾癘

陰陽失序致茲疫癘之流行天地至仁寧忍顛連之
無告眷言南劍介在閩陬地狹人稠而氣鬱不舒山
高嵐重而疾為易感嗟舊歲札瘥之薦至迨今秋疢
孽之復萌一旦不堪再焉可保雖勤拯卹未底康平
自知人力之易窮惟願高穹之悔禍敬投丹慤仰扣
紫檀避正堂責己以思愆為闔郡生民而請命庶幾
真宰垂矜憐惻怛之情坐使閭閻致安靜和命之福

又上元設醮

自叨收養浚旄旱沴之餘已荷生成覲望豐穰之賜
叨心籲帝祈福為民瞻此雷澤頃遭魃厲既少收於

田畝仍多病於問閭性命偶全飢羸莫保撫字曷殫
於綿薄康寧實賴於蒼昊一雨既沾三農有望天從
民欲於肝膈以潛通時和歲豐庶札屨之永息

上梁文

安溪縣重築縣廨

藍溪古縣桐郡名鄉市環千室之弦歌水遠萬山之
耒耜民居錯落既日盛而歲繁公宇陋庠顧風旁而
雨上庸改高明之觀以通幽隱之情役不及民財惟
節用耽耽榮棟夏涼冬煖以俱宜行衍衍賓僚辰入
酉歸而共沾必省內以無愧斯面南而不慙未能鳴

算父之琴遠希子賤姑少葦襄城之解近効忠宣肇
舉脩梁敢伸善頌

免郎偉拋梁東衮衮清波湧日紅試問百川朝巨海
何如萬國仰重瞳

免郎偉拋梁西百丈新虹跨鳳池多謝邑人齊着力
春風穩穩上雲梯

免郎偉拋梁南王立魏峰覲面三下闕碧潭秋夜月
此心此景兩停涵

免郎偉拋梁北君王不戰邊烽息北湖從此定無人
四海由來歸有德

免卽偉拋梁上日月風雲妙相盪須知天命豈難謀
勿謂愚民庸可誑

免卽偉拋梁下萬頃黃雲喜多稼從今風雨了無憂
只待冬深臘蜡

伏願上梁之後時和歲豐民康俗厚春風百里總鷄
棲犬卧之鄉午日一遲無雀角鼠牙之訟共宣忠力
少報君恩

白湖順濟廟重建寢殿

昔稱湘水神靈獨擅南方今仰白湖香火幾半天下
同祠宇殆周於甲子規摹增煥於此時紀正直聰明

福同於天道周匝宏博利澤覃於海隅人人盡得所
求戶戶願殫其力不日遂成於遂宇凌霄有類於仙
居用赫厥靈以報有德神豈厭舊衆惟圖新脩梁既
舉於佳辰善頌宜騰於衆口

兎郎偉拋梁東獵獵神旗照海紅但見舳艫來又去
泰祥造化不言功

兎郎偉拋梁西石室雲巖晚照齊虜寸便為千里潤
農夫不復卜朝濟

兎郎偉拋梁南地勝長魁鼎足三海脚東來連地遠
壺巔直上與天參

免郎偉拋梁北塞上狼煙今永息山行水宿絕偷攘
浙水淮濡來菽麥

免郎偉拋梁上十萬人眾環首向風馬雲車自往來
錦衣瓊佩相飄颻

免郎偉拋梁下斥鹵瀟漫開沃野黃雲收盡月華明
簫鼓聲中渾福蝦

伏願上梁之後神人安妥年穀順成賈無風魚之災
士有雲龍之慶春秋載祀來千里之牲牢億萬斯年
報九重之寵命

安溪月湖念語

潘安仁種河陽花流芳籍甚李元勳憇虞城柳清蔭
依然可以長生簿書之勞而無一日遊息之暇藍溪
古縣衆郡勝區二頃碧湖翠華萬蓋四圍青嶂紅隱
初粧雖無高車結駟之遊剩有乘鴈雙鳬之適鳥鳴
深逕韻甚絲簧牛載小童安於輿馬暇日邀朋共醉
暑風馳想先醒樂固在心景為有助欲展娛賓之伎
請陳悅耳之詞